

# I joegn, davegnir de la cooperazion

Teresa Lorenz del Fassa Coop e La Risola à portà dant trei scontrèdes de informazion e formazion su la cooperazion a la Malga Aloch de Poza avertes a duc i joegn de Fascia



**N bon grop de joegn se à binà te la trei seres a la Malga Aloch per tor pèrt a la scontrèdes.**

**Cooperazion** - L titol del projet portà dant da la Coprativa de Fascia e tout sù dal pian joegn de zona la Risola l'era "Descorir la Cooperazion" e l'obietif apontin chel de ge dèr l met ai joegn de se fèr ite e cognoscer chel che l'é la cooperazion. Trei dis de scontrèdes una dò l'otra aló da la Malga Aloch de Poza con ogne sera n tem desferent che à vedù protagonisc persones cognosciudes e ejempies de luster per duc e soraldut per i joegn, davegnir de noscia sozietà e donca de noscia Copratives. L'empontanza de la relacions anter la persones, de spener su nosc teritorie e de la speranza de tor ite semper de più duta la Val. Per l'ocajion l'é stat pissà ence n logo e n slogan "se reladinisèr" che l'é n neologism che volessa dir evoluzion e mudament desche la faja de la vita che l'é la joeneza. L simbol l tol ite 3 cerchies, numer perfet, che pèrt da na reisc soula e che se aur fora, desche i joegn che col doventèr gregni i troa ogneun sia dimension. L prum di relator l'é stat Carlo Dellasega, diretor de la Cooperazion Trentina che à rejonà del nonzech del model cooperatif Trentin, tout da ejempie adertura stroz per l mond.

## La Cooperazion te Fascia

La sera dò te na sala amò più piena de joegn se à binà i maores raprejentanc de la cooperazion de Fascia, L Fassa Coop, l Consorzie Eletrich de Poza (CEP), la Cassa

Rurèla e la Mèlga de Fascia.

A prejentèr un a l'outa i ghesc chela sera l'é stat Stefano Benatti de la Cassa Rurèla. L'obietif l'era portèr dant la istories de chesta 4 copratives ruèdes enschin aldidanché con na gran forza e apede moscèr coche les é structurèdes e coche les laora ades.

Na istoria, chela de la copratives de Fascia, leèda soraldut a la gejia. Defat te la maor pèrt di caji l'era i preves n'outa che i aee metù en pé sibie la Cassa Rurèla de Fascia che la Coprativa de Sèn Jan.

La pruma senta de la Cassa Rurèla a nascer te Val l'é stat chela de Ciampedel del 1898 e l'an dò, del 1899, l'é stat avert la Cassa Rurèla de Moena. Te chisc cent e passa egn i momenc de crisa i é stac n muie ence per colpa de la doi gran veres. De positif ampò l'é stat che te duc chisc egn se é stac bogn de se meter ensema te na Cassa Rurèla soula semper più forta e competitiva ence ti confronc de l'otra Banches che vegn da fora e che segur "no les à l cef chiò te noscia Val". Dò che l president Carlo Vadagnini l'à rejonà de la storia l'é stat l'outa del diretor Luciano Braitto che l'à moscià la situazion di sozi, presciapech de 3200, e ence de coche vegn gestì i sparagnes e i investimenc.

Dò da ic l'é stat l moment de Dino Detomas, diretor del CEP, che l'à rejonà de la storia del Consorzie Eletrich, nasciù del 1914, de canche l'era demò la veia zentrèla te Val Sèn Nicolò e che con 60 kilowatt se era bogn de enlumenèr duta la

Val de Fascia fin sun Pordoi. Dò la doi veres e soraldut dò la nazionalizacion de l'energia eletrica l consorzie l'à passà fora dassen n trat de temp "scur" de fadies economiches. Anchecondi ampò l CEP l'é l più gran consorzie del Trentin e, enceben con vèlch problem de regolamenc, se proa a se slarièr fora ence a Soraga e a Pera e l'à na forza che la é bona de manèr fora, da Nadèl adertura 6000 kilowatt istantane. Per i 1052 sozi e i 2920 utenc segur fèr pèrt del Consorzie l'é n vantac che se pel desfrutèr proprio de gra soraldut a la jent de Fascia che adertura se à venù la vaces per salvèr l Consorzie. A la domana se se podessa amò jir endò e slarièr fora l Consorzie eletrich a duta Fascia Dino Detomas l respon che no fossa possibol ajache l consum l fossa massa aut e se cognessa coscita comprèr energia da l'Enel e ge la vener a la jent e chest donca no fossa segur competitiv per nesciugn.

Per la Mèlga de Fascia, nasciuda ta Ciampedel del 1963, l'é stat l president Paolo Brunel che à dit che chela de Fascia apontin l'é la mèlga più "joena" del Trentin e che l'é proprio i joegn che i domana de fèr pèrt de la mèlga che fèsc ogne an 25 mile moles de formai. L Cher de Fascia dapò l'é venù te dut l nord de la Tèlia e ence tel nord de l'Europa, ti pajes de la Scandinavia. Dapò, se sà ben, tras i ghesc chest formai l rua daperdut. Tel davegnir i obietives de la mèlga l'é chi de se tramudèr a Pera n'outa che l fabricat

sarà vertech, e dapò de tor ite i soi doi bachegn che no é amò sozi.

Del 1896 a Sèn Jan, cher de la comunanza de Fascia enlouta e ence aldidanché, per la pruma outa vegnia averc i ujes de la Coprativa de Fascia. Averta demò la domenia dò messa grana la coprativa venea prodoc del post e che ruèa te coprativa proprio de gra a chela dotrei families che se metea ensema a fèr, per ejempie, smauz o formai e che dapò l ge lo venea a la coprativa. Demò del 1962 se à tacà a fèr fora la pruma filiales e con l didament de duc i sozi, de numer semper maor, la Coprativa de Sèn Jan la é doventèda la più grana de Fascia con 1800 sozi. Tel passà più outes se à proà a se meter ensema con Ciampedel, Cianacei e Moena ma semper per pech no se é rué a chest obietif. Dant dal president Milio Gross e dò dal diretor Luca Giongo l'é stat sottrissà l'empontanza di sozi che l'é i prumes e i veri patrons de la coprativa, zenza de ic o zenza sie gradiment, la copratives no aessa met de esser.

L diretor Luca Giongo l'à serà sù sottrissan che a el ge sà proprio bel se recognoscer te la cooperazion ajache "al Fassa Coop compron l formai da la mèlga e l lat da Filippo da Vich, duron l'energia del Consorzie e i scioldi i meton te Cassa Rurèla!!!"

## Troèr da nef la gaissa te la reijes de nosc teritorie: "se reladinisèr"

Te l'ultim apuntament di trei dis a la Malga Aloch per cognoscer ence realtèdes desvalives da la noscia l'é stat portà dant l'ejempie n muie enteressant de copratives che su l'ejempie del Trentin, portà da monsegnor Bregantini, les é states bona de meter sia reijes tel Sud de la Tèlia per scomenzèr, travers l jent de "lurèr adum", a librèr la jent del post dal recat de la ndrangheta. De chesta scontrèda rejonaron amò più avisa sul numer che vegn de La Usc.

Chel portà dant per trei serèdes una do l'otra l'é stat n percors de informazion e de formazion col zil de creèr na coscienza ti joegn a na vida che i se sente stolc de fèr pèrt de na realtà scì empontanta e che i entene l valor de stèr ensema e

tegnir aut e fort l lurier de la Copratives sul teritorie. Defat, descheche l'é stat dit te una de la scontrèdes, demò aziendes dal post e la copratives da chiò les à l cef tel teritorie e no utró, e de gra a chest les pel coscita se cruzièr de re-investir i scioldi te noscia sozietà no ge fajan mai mencèr a nesciugn n contribut per portèr dant sia ativitèdes. Chel che l'é stat fat de gra a la fadies e a la renunzies de nesc aves fossa n pecià se l desmentier. Te Fascia no l'é semper stat richeza e bonstèr, la Copratives più veies adertura les à cognù passèr fora la doi veres e l'é stat demò de gra a la jent che les à podù ruèr enschin a anchecondi olache les raprejenta na pèrt economica dassen empontanta de noscia Val. Per l'ocajion l'é stat pissà ence n logo e n slogan "se reladinisèr" che l'é n neologism che volessa dir troèr da nef la gaissa te la reijes de nosc teritorie e esser bogn de se meter adum te na gran rei de relacions che tole ite duta Fascia e duc i setores de la sozietà.

Per chi che à portà dant chest projet, Teresa Lorenz e l diretor Luca Giongo, l'é stat dassen na gran sodesfazion per l'ejit che à abù la trei serèdes che l'é stat ence n moment pajegol con oles de la fortuna per chi che tolea pèrt e amò a la fin n bon marendel per duc. I joegn e la coprativa, n leam fort donca che l vegn palesà ence daite de la copratives che te chisc ultimes tempes les veit n bon numer de neves sozi joegn se arvejinèr a chesta realtà che dant da dut met i raporc anter la jent e la crescimonia de duta noscia sozietà.

Valentina Redolfi



**La voia con su l nef simbol e la scritta "Se reladinisèr".**



**L diretor de la Cooperazion Trentina Carlo Dellasega coi raprejentanc de la Copratives de Fascia e del Trentin.**



**Ti trei dis l Fassa Coop é stat fornì con balons e gramieù de desferenc colores: l prum di l checen, l secondo di l bianch e l terzo di l vert.**